

中国西南民族史 配布資料

4. 六朝末～隋唐初の雲南民族

4.1 『南齊書』卷十五 州郡志下

寧州，鎮建寧郡，本益州南中，諸葛亮所謂不毛之地也。道遠土瘠，蠻夷衆多，齊民甚少，諸爨、氏彊族，恃遠擅命，故數有土反之虞。領郡如左……（下略）

4.2 『增訂南詔野史』卷上

白子國

漢武帝通西南夷，遣使至滇，求身毒國。滇王常羌問使者曰：「漢孰與我大？」使者還報，武帝怒其言不遜。時白崖國蒙且頌之後，天竺國白飯王之裔仁果者，爲衆所推立於白崖。武帝乃冊封仁果爲王，號白子國，後遷於澂江。迨龍佑那繼之，號建寧國。又一說：白子國之先，有阿育國，王能乘雲，上天娶天女，生三子，長季二子封於金馬、碧雞，獨封仲子於蒼洱之間，崇奉佛教，不茹葷，日食白飯，人因稱爲白飯王。迨後有仁果者，漢封爲滇王，號白子國。又十五世至龍佑那，後漢諸葛武侯南征，次白崖，以佑那爲酋長，賜姓張氏，仍統其民，號建寧國。

建寧國

後漢後皇帝乙巳建興三年，益州耆帥雍闓，假鬼術殺建寧太守王昶，還東吳，吳王孫權以闓爲永昌太守。後漢諸葛武侯南征，至白崖，殺雍闓，擒孟獲，及封白子王仁果十五世孫龍佑那爲酋長，賜姓張氏，於白崖築建寧城，號建寧國，立鐵柱并南中紀功碑，銘其背曰：萬歲之後勝我者過此。迨至隋時，行軍總管太平公史萬歲征南寧夷爨，西破三十餘部，至此見其碑，命左右踏之。其碑跌，中復有誌曰：「史萬歲不應踏吾碑。」萬歲驚異，復樹碑，祭拜而去。後張龍佑那仍遷國澂江，傳三十二世至十七世孫張樂進求，唐太宗己酉貞觀二十三年封爲首領大將軍。後見蒙舍川蒙細奴邏有奇相，遂妻以女，遜國與之，奴邏自稱奇嘉王，建號大蒙國，又稱南詔。

4.3 『隋書』卷三十七 列傳第二 梁睿

睿時威振西川，夷、獠歸附，唯南寧酋帥爨震恃遠不賓。睿上疏曰：「竊以遠撫長駕，王者令圖，易俗移風，有國恒典。南寧州，漢世牂柯之地，近代已來，分置興古、雲南、建寧、朱提四郡。戶口殷衆，金寶富饒，二河有駿馬、明珠，益寧出鹽井、犀角。晉太始七年，以益州曠遠，分置寧州。至僞梁南寧州刺史徐文盛，被湘東徵赴荊州，屬東夏尙阻，未遑遠略。土民爨瓚遂竊據一方，國家遙授刺史。其子震，相承至今。而震臣禮多虧，貢賦不入，每年奉獻，不過數十匹馬。其處去益，路止一千，朱提北境，即與戎州接界。如聞彼人苦其苛政，思被皇風。伏惟大丞相匡贊聖朝，寧濟區宇，絕後光前，方垂萬代，闢土服遠，今正其時。幸因平蜀士衆，不煩重興師旅，押獠既訖，即請略定南寧。自廬、戎已來，軍糧須給，過此即於蠻夷徵稅，以供兵馬。其寧州、朱提、雲南、西爨，並置總管州鎮。計彼熟蠻租調，足供城防倉儲。一則以肅蠻夷，二則裨益軍國。今謹件南寧州郡縣及事意如別。有大都督杜神敬，昔曾使彼，具所諳練，今并送往。」書未答，又請曰：「竊以柔遠能邇，著自前經，拓土開疆，王者所務。南寧州，漢代牂柯之郡，其地沃壤，多是漢人，既饒寶物，又出名馬。今若往取，仍置州郡，一則遠振威名，二則有益軍國。其處與交、廣相接，路乃非遙。漢代開此，本爲討越之計。伐陳之日，復是一機，以此商量，決謂須取。」高祖深納之，然以天下初定，恐民心不安，故未之許。後竟遣史萬歲討平之，並因睿之策也。

4.4 『隋書』卷二 高祖本紀

（開皇）十七年春二月癸未，太平公史萬歲擊西寧羌，平之。

4.5 『隋書』卷五十三 史萬歲傳

先是，南寧夷爨翫來降，拜昆州刺史，既而復叛。遂以萬歲為行軍總管，率眾擊之。入自蜻蛉川，經弄凍，次小勃弄、大勃弄，至于南中。賊前後屯據要害，萬歲皆擊破之。行數百里，見諸葛亮紀功碑，銘其背曰：「萬歲之後，勝我者過此。」萬歲令左右倒其碑而進。渡西二河，入渠濫川，行千餘里，破其三十餘部，虜獲男女二萬餘口。

4.6 『新唐書』卷二百二十二下 南蠻傳下

松外蠻尚數十百部，大者五六百戶，小者二三百。……貞觀中，巂州都督劉伯英上疏：「松外諸蠻，率暫附亟叛，請擊之，西洱河天竺道可通也。」居數歲，太宗以右武侯將軍梁建方發蜀十二州兵進討，酋帥雙舍拒戰，敗走，殺獲十餘萬，羣蠻震駭，走保山谷。建方諭降者七十餘部，戶十萬九千，署首領蒙和為縣令，餘眾感悅。

西洱河蠻，亦曰河蠻，道繇郎州走三千里，建方遣奇兵自巂州道千五百里掩之，其帥楊盛大駭，欲遁去，使者好語約降，乃遣首領十人納款軍門，建方振旅還。二十二年，西洱河大首領楊同外、東洱河大首領楊斂、松外首領蒙羽皆入朝，授官秩。顯慶元年，西洱河大首領楊棟附顯、和蠻大首領王羅邗、郎昆梨盤四州大首領王伽衝率部落四千人歸附，入朝貢方物。其後茂州西南築安戎城，絕吐蕃通蠻之道，生羌為吐蕃鄉導，攻拔之，增兵以守，西洱河諸蠻皆臣吐蕃。開元中，首領始入朝，授刺史。會南詔蒙歸義拔大和城，乃北徙，更羈制於浪穹詔。浪穹詔已破，又徙雲南柘城。

4.7 西洱河風土記（『通典』卷一八七 南蠻上 松外諸蠻）

松外諸蠻，大唐貞觀末為寇。遣兵從西洱河討之。洱音貳。其西洱河，從巂州西千五百里，其地有數十百部落，大者五六百戶，小者二三百戶。無大君長，有數十姓，以楊、李、趙、董為名家，各據山川，不相役屬。自云其先本漢人。有城郭、村邑、弓矢、矛鋌，言語雖小訛舛，大略與中夏同。有文字，頗解陰陽曆數。

自夜郎、滇池以西，皆云莊躋之餘種也。其土有稻、麥、粟、豆，種穫亦與中夏同，而以十二月為歲首。菜則蔥、韭、蒜、菁，果則桃、梅、李、柰。有絲麻，女工蠶織之事。出絁、絹、絲、布〔、麻〕，幅廣七寸以下。〔染色有緋帛。〕早蠶以正月生，二月熟。畜〔則〕有牛、馬、豬、羊、雞、犬。飯用竹筍，搏之而噉。羹用象〔牙〕杯，形若雞彝。有船無車。男子以氈皮為帔，女子絁布為裙衫，仍披氈皮之帔。頭髮有髮，一盤而成，形如髻。阻瓜反。男女皆跣。至於死喪哭泣，棺槨襲斂，無不畢備。三年之內，穿地為坎，殯於舍側，上作小屋。三年而後，出而葬之，蠶蚌封棺，令其耐濕。〔豪富者殺馬牛祭祀，親戚必會，皆賚牛酒助焉，多者至數百人。〕父母死，皆斬衰布衣，〔不澡，〕遠者至四五年，近者二三年，然後即吉。其被人殺者，喪主以麻結髮，而黑其面，衣裳不緝。唯服內不廢婚嫁。娶妻不避同姓。〔富室娶嫁，金銀各數十兩，馬牛羊皆數十頭，酒數十瓶。女之所其俗賚金銀，將徙亦稱顯，婿不親迎，女至其家，亦有拜謁尊卑之禮。〕其俗，有盜竊、殺人、淫穢之事，酋長即立一長木，為擊鼓警眾，共會其下，強盜者眾共殺之。若賊家富強，但燒其屋宅，奪其田業而已〔，不至於死。穿踰盜者，九倍徵賦。処女孀妻，淫佚不坐，有夫而淫，男女俱死。不跨有夫女子之衣，若姦淫之人，其族強者，輸金銀請和，妻則棄之。其兩殺者死。家族即報復，力不能敵，則援其部落舉兵相攻之〕。

4.8 『蠻書』卷四 名類第四

西爨，白蠻也。東爨，烏蠻也。當天寶中，東北自曲、靖州，西南至宣城，邑落相望，牛馬被野。在石城、昆川、曲輒、晉甯、喻獻、安甯至龍和城，謂之西爨。在曲、靖州、彌鹿川、升麻川、南至步頭，謂之東爨，風俗名爨也。初，爨歸王為南甯州都督，理石城，襲殺孟聘、孟啓父子，遂有升麻川。歸王兄摩湏。湏生崇道，理曲輒川為兩爨大鬼主。崇道弟日進、日用在安甯城。


4.9 『新唐書』卷二二二上 南蛮伝上

南詔，或曰鶴拓，曰龍尾，曰苴咩，曰陽劍。本哀牢夷後，烏蠻別種也。夷語王爲「詔」。其先渠帥有六，自號「六詔」，曰蒙騫詔、越析詔、浪穹詔、遼睨詔、施浪詔、蒙舍詔。兵埒，不能相君，蜀諸葛亮討定之。蒙舍詔在諸部南，故稱南詔。居永昌、姚州之間，鐵橋之南，東距爨，東南屬交趾，西摩伽陀，西北與吐蕃接，南女王，西南驃，北抵益州，東北際黔、巫。王都羊苴咩城，別都曰善闡府。

4.10 『資治通鑑』卷二一四 唐紀三十 玄宗開元二十六年（738）九月


戊午，冊南詔蒙歸義爲雲南王。

歸義之先本哀牢夷，地居姚州之西，東南接交趾，西北接吐蕃。蠻語謂王曰詔，先有六詔：曰蒙舍，曰蒙越，曰越析，曰浪穹，曰樣備，曰越澹，考異曰：新書「六詔曰蒙騫、越析、浪穹、遼睨、施浪、蒙舍。」今從資治通鑑南別錄。兵力相埒，莫能相壹；歷代因之以分其勢。蒙舍最在南，故謂之南詔。




紀元前 2 世紀の交通路

7 世紀の交通路




南詔蒙氏（蒙舍詔）系図




六詔系図（蒙舍詔を除く）


蒙巖詔




越析詔



浪穹詔



澄談詔



施浪詔

